

PUISII
IN
VERSI LIBIRI

LA PINNA

Pinzati,
si la pinna fussi viva,
nun stassi sempri
a lu cumannu nostru.
Rifiutassi
di scriviri cosi,
cosi tinti;
di mali, di guerra, di morti.
Pinzati,
si scrivissi sulu
d'amuri, di paci, di beni.
Ma certi cosi scritti
cu lu 'nchiostru
s'hannu pagatu
cu lu sangu nostru.
La curpa nun è d'idda
ma di l'omu
chi trasforma
'st'anticchia di cosa
'nta 'na spata,
'nta 'n'arma pirculosa
chi firisci e ammazza genti
di luntanu.
Sulu 'nta li manu
di lu pueta
diventa 'na cosa priziusa,
'na cosa essenziali,
pi scriviri

sintimenti, passioni, turmenti,
chi nun fannu mali
a nuddu,
forsi sulu a iddu.
E quannu la penna finisci,
lu pueta nun la jetta;
si la cantia, la ringrazia, ci parra
comu fussi viva.
Ma purtroppu idda
di la vita è priva,
e scrivi soccu è ed è.

2008

LA NOTTI

Benvinuta amica notti,
tu chi a tanti fai cantari,
a mia no.
A mia m'appari
vistuta eleganti, di scuru,
comu 'n'amanti
chi si fa bedda
pi venimi a truvàri.
E mentri m'abbrazzi
ti parru,
mi strinci a lu pettu
e m'ascuti,
ti cuntù lu jornu, li fatti
e rispunni.
Mi duni spiranza,
la forza
pi 'n autru jornu,
chi puru s'è tintu
finisci.
E mi vegnu a 'ncuntrari cu tia
chi m'appari
arré
bedda 'nta lu scuru,
mi fai vidiri senza luci,
mi fai séntiri stannuti zitta.
Oh tu notti...
l'amanti perfetta.

2008



VITA NIGATA

Mi sintia
‘nta ‘na vutti di ferru,
dintra a tia sicurizza ‘nfinita;
mi sintia
‘na castagna prutetta
chi ti puncì
si ci tocchi lu fruttu.
Mi ‘mmagina già
lu to caluri,
li to’ carizzi, lu ciauru,
l’amuri.
T’appuiavi la manu a la panza,
ti sintia
e cu ‘n corpu di pedi
ti dicia:
“Cca sugnu,
matri mia!”
Ma tu
di ‘stu nomu ‘un si degna
picchè
mi nigasti la vita
e comu si nenti fussi
mi jittasti.
E ora sugnu cca
‘n menzu a tutti l’anciliddi
chi mi dumannaru maravigghiati:
“Arré cca tu chi ci fai?”
Ed eu, chiancennu:
“Riturnavi...
me matri ‘un mi vosi.”

2008

NNUCCENZA

Vattinni nnuccenza,
lassami stari!
Pi tia
cca dintra postu 'un ci n'è chiù.
Troppu voti
li carni m'haiu abbruciatu;
troppu voti
t'haiu vistu 'nta l'occhi
di un nuzzenti chi chianci pi tia;
troppu voti
t'haiu vistu scurpita
'nta la facci di 'na fimmina
'ncagghiata
'ntra li granfi toi
e 'ntra chiddi di un omu
to complici.
Pi favuri vattinni!
Nun ci nesci chiù nenti pi la jatta.
Ammatula ci provi
travistuta di fiducia
nun ci 'ncagghiu chiù;
nun criu chiù mancu a idda,
'st'otra surastra tua
tradimintusa...
E t'assicutu!
Ma mentri t'assicutu
ti ringraziu,
picchè pi tia
nnuccenza suvicchiusa

chiù omu addivintavi,
chiù forti mi fici.
E comu a tia
chi prima mi 'ncagghiavi
e poi mi lassavi 'n chiancennu;
puru eu,
ora,
mi sirvivi di tia
e ti vulissi lassari,
ma nun pozzu!
Fai parti di mia.
Comu l'ùmmira
mi veni appressu
e a li voti mi passi...

2008

PI TUTTI È NATALI

Cadia la nivi,
mattula leggera,
lu vintiquattru notti
di dicembri.
Sunava la campana,
menzannotti.
Tutti l'arvuli cunzati,
li prisepi.
Di darrè la finestra
taliava 'ddi regali sutta 'dd'arvulu
paratu di stiddi filanti
e di luci stralucanti.
Poi me patri mi dicia:
"Vâ curcati ch'è tardu;
dumani lu sai ch' è Natali?"
Ma 'nta la casa nostra
lu prisepi
cunzatu 'nta 'n agnuni
nun era comu chiddu di lu vicinu;
c'eranu sulu
quattru cosi fatti a manu
di me matri.
Eu ci dumannava:
"Papà, quann'è chi l'accattamu puru niatri
li pasturedda, li stiddi filanti?
Quannu ci li mittemu
li regali?"
E iddu
cu 'n surrisu e 'na carizza
mi dicia:

“ ‘N atru annu sangu meu

‘n atru annu...

Ora,

ogni vota chi veni Natali,

c’è lu prisepe fattu bonu,

l’arvulu di tri metri cunzatu,

li regali.

Ma ‘nzina a ora nuddu regalu

ha statu beddu

comu

‘ddu surrisu e ‘dda carizza.

2008